

vnd der Hopffe reiffer ist / vnd ja er lenger
kocht / ja besser farbe die Biere kriegen /
vnd hitziger werden / Vnd man kan also
von wegen der farbe / vrtheilen / welche
Biere starck oder nicht starck sein / Als
nemlich / Das die Biere / so eine gute far-
be haben / starcker temperatur vnd art
sein / Die andern aber / so nicht so gute
farbe haben / nicht so starck befunden wer-
den.

Vom dem geruch des Biers.

Die Biere habē alle einē gemein-
en geruch / wie auch einen gemein-
en schmack / dadurch sie vō andern
gekochten Wassern vnd säfftern /
vnterscheiden werden / Vber diesen gemein-
en geruch / haben sie auch noch etliche son-
derliche qualiteten / daraus ein grosser vn-
terscheidt zuergreifen / Denn man findet
etliche Biere / die einen gewürzten ge-
ruch vnd geschmack an ihnen haben / gleich
wie die aufferlesenen Torgischen Biere /
Item / das Santscher vnd Lübisck Roth
Bier / Vnd diese Biere / ohn das sie wol
nutrürn vnd alterirn / stercken sie auch das
hertz vnd Gehirn des Menschen.

Von dem geschmack der Biere.

Die